



P O M P O N I I B R V N E L L I

In festum diem Sanctæ Mariæ
ad Niues

O R A T I O.



QUANTVS mihi patet campus, in quo mea hæc excurrere atque exultare possit oratio, Praesules amplissimi, atque optimi & ornatissimi Auditores, quam vberem atque immensam dicendi vim affert hodiernus hic dies; tantus dicendi timor inijcitur, tamque copia inopem facit; quum mihi sit brevissimo temporis curriculo perorandum. Quis enim, qui summam videat aestuantium appetitionum molem, humanarum perturbationum flammam, ardentem cupiditatum faces, quas summo conatu funestissimi hostes in perniciem nostram contorquent, debilitari, frangi, extinguere, in summis aestiuo temporis iniurijs, e caelo delapsis diuinitus niuibus; diuinam beneficentiam non agnoscat, diuina munera non suspiciat, non quamlongissima & ornatissima oratione celebret, exomet, amplifcet? Verumtamen detur hæc mihi venia, ut paucis multa complectar, dum Deum Optimum Maximum precor, ut me, qui non ætate, non consilio, non scientia valeo, sancti spiritus afflatu paullulum excitatum, ita desertum reddat, ut vel tacitus res admirandas queam animorum vestrorum sensibus repræsentare. Age vero quid Ioanni patritio delibe-

ranti, qua ratione tandem suis opibus Mariae Virgini gratificari posset, ad templum Virgini extruendum potuit commodius per visum obijcere diuina illa prouidentia, quam Esquiliis niue conspergendas? Quid enim esse candidius potest, quid purius, quid aspectui gratius? At magna quidem res est, quae ex huius mirificae niuis indicio mihi sane videatur existere. Virginis illius profecto, Virginis, quae Deum hominem peperit, nulla umquam ex parte violata, consilio ac significatione, integerrimi viri diuitiae fuerant erogandae. Templum illa sibi, niue aestiuo calore praeter naturam coacta, humanis exaedificandum viribus indicauit. Ergo diuinus accedit nutus, afflat spiritus illè, qui cum patre & filio ab omni aeuo regnauit, in omne aeuum perpetuo regnaturus. Deligitur locus idoneus, & in altitudinem collis porrectus, ubi e templo, tamquam ex altissima specula, te, Roma, Virgo, te, inquam, Roma, obseruaret in primis orbis terrarum, vrbumque reginā Dei mater ac caeli regina: te ferret in oculis assidue, te spectaret studiosissime, volentem tamen, non recusantem, non tergiuersantem. Idem Liberio Optimo Maximoque Pontifici, quod Ioanni Patritio per quietem significatur. O diuinam amoris amplitudinem, o immensam diuinitatis faciem, o caeleste, & ante hoc tempus inauditum munus, quod e caelo delapsum, nouam in terris, & Romae sedem caeli reginae descripsit. Virginem illam Dei parentem facultatibus suis colendam putat amplissimus ille vir, vir, inquam, ille animi excelsi, magnifici, religiosi. Collustratum ad templi aedificium locum, effusa niue, sibi deposcit Virgo, atque Virgini templum prope niueum delegit Deus, qui niueo Virginis fuerat lacte altus & enutritus. Tu Virgo, tu eadem mater Christi, tu mater Dei & hominis: tu profecto humani generis solatium, pax, triumphus: tu summa ac sapientissima rerum humanarum patrona, & fautrix, solum, quod templum tibi iustineret, tuo praecipuo illo signo obsignatum esse voluisti. Quid enim aliud declararet, quid indicet huiusmodi signum, nisi integritatis pudicitiaeque virgineae simul, ac matris splen-

splendorem? Et sane, quid illa purius? Et macula non est in te. quid foecundius? Et genuisti puerpera Regem. quid beatius? Et peperisti Deum & hominem. quid praestantius? At deliciae tuae esse cum filiis hominum. O signum de caelo amplissimum, praeter omnium expectationem, de repente in terras, atque in urbem delatum: imo vero ad humanae beatitudinis spem sublatum: erectum ad aeternitatis bona recuperanda. Contuemini, Auditores, animis vestris, intendite cogitationes, reuocate mentes, cernite nitorem, quo locum illum spiritus diuinus conspersit, condecorauit, ornauit. Traducamus in nos singillatim tantum, tam admirandum, tam illustre mysterium. Non me latet neminem esse vestrum, quin se Mariae Virginis, atque adeo ipsius Dei, Virginis instar, quae Dei templum re ipsa facta est, effici voluerit, & exoptarit. At cui tandem id facillime ex animi sententia contigerit? Quicumque profecto se nouerit corpore animoque constare, ea tamen lege, vt per illustriores animi vires, ad Deum in sublime ferri possit: verumtamen per corporis graue pondus deorsum se varie deiici sentiat, ac deturbari: atque, dum vehementioribus perturbationum aestibus, primi sibi parentis labe iniectis, misere incenditur, candidae integritatis luce refrigeretur aequae, atque illustretur; ille tandem ex humana labe ac caeno in diuinum quoddam & niueum solium (qui fructus est integritatis vberimus) mirifice transfertur. Ibi templum Deiparae, eiusque filio, rerumque omnium conditori Deo facillime exabit: ibi Deus ipse matris suae templum clementissime aspiciet, tuebitur, fovebit: ibi, inquam, templum exabit immensum, pulcherrimum, augustissimum; vnde quidquid in terris, quidquid in caelis boni, quidquid iucundi, aeterni, diuini excogitari, fingique possit, aspiciatur, planissimeque cernatur. inde enim facillime iucundissimus, ad ipsam diuinitatem, pro humanae conditionis viribus, contemplandam, patebit aspectus. O templi ingentis amplitudinem, o immensitatem, quae humanae mentis acie, non dicam comprehendi, sed vix attingi posse videatur;

Fateor

Factor equidem, Auditores, oneris me succumbere magnitudi-
 dini, ac tantarum rerum moli imparem esse; quippe qui ver-
 ba desiderem, quibus (id quod experientia ac res ipsa po-
 tius declarat, quam vel sapientissimi cuiusquam aureum
 eloquentiae flumen ostendat) persuadeam vobis, vt in animis
 vestris Virgini matri templa augustissima erigatis. Sapienter
 vero egisse putauerim maiores nostros, quum hodiernum,
 diem ad nos praesertim, qui ideo clerici dicimur, quod & nos
 Deum nostram esse sortem, & haeriditatem voluerimus, &
 nos ad se solum Deus voluerit pertinere; qui, vt sacris initie-
 mur, nomina dedimus, qui ad rerum humanarum contemptio-
 nem nobis capillum tonderi passi sumus, spectare censue-
 runt. Quid enim aliud illos egisse arbitremur, nisi, vt, qui
 Dei templa futuri essemus, quae per augustissimum Eucha-
 ristiae mysterium incoleret immortalis Deus; mentes nostras
 Mariae Virgini, quasi quasdam praecellias aedes, prauis ani-
 mi perturbationibus mitigatis, pudore, temperantia, integri-
 tate, consecraremus? Quod si viam ac rationem quamdam ex-
 peditam & facilem vobis aperiam, vt huiusce nostri voti iam
 compotes fiamus, peto a vobis, Auditores, vt in bonam par-
 tem accipere ne grauemini. Ac primum quidem etiam atque
 etiam cogitandum videtur, nos quoque colles esse interrea
 quosdam, per Mariam Virginem niue conspersos, vt omni ani-
 mi labe diligentius expiata, in nobis sint amplissima per vir-
 tutum aedificationem templa construenda. Tum vero ne
 committamus, vt aliae inanes atque fallaces cogitationes nos
 a suscepto consilio reuocent, sed vt ab huiusmodi templi aedi-
 ficandi cura, studio, labore ne recedamus. Id vnum sit nobis
 cordi, vt aegritudinum aestum ardoremque nix illa tempe-
 ret, refrigeret, mitiget. Etenim hac aetate, quae ad res leues
 & caducas facillime rapitur, saepenumero memoria tepeten-
 dum existimo, quid profiteamur, quid agamus, quid etiam
 praestolemur. Nos in sacris hisce Apostolorum principis aed-
 ibus, omnium amplissimis ac celeberrimis Deo ministramus:
 nos ad studia litterarum, nos ad pietatem denique vocat, al-
 licit,

licit, inuitat Deus, ne recusemus, ne abnuamus, ne laborem subterfugendum putemus. Aderit ille idem Deus laborantibus nobis, nobis fauebit, nos tuebitur, subleuabit, complectetur. Postremo egregiarum exempla virtutum, quae nobis affert vniuersus hic Apostolorum principi illi sanctissimo dicatus, praestantissimorum virorum ordo, obseruanda censeo diligenter, & quamstudiosissime imitanda. Adiones igitur praeclaras tam illustrium hominum, quibus haec loca quotidie celebrari cernimus, ad nostrarum incitamenta virtutum, semper in mente nobis haereant infixae: quibus quantum certe tum hoc ipso, tum multis alijs nominibus debeamus, non facile dixerim. Hic vero mihi, viri ornatissimi, pro vestris in me, & in caeteros clericos collatis beneficijs, agenda quidem esse gratiae viderentur. Verum quum nemo sit nostrum, qui tanta erga nos merita, non dicam verbis, sed ne mente quidem concipere atque assequi possit; summis precibus a Deo Optimo Maximo diebus singulis contendamus, oportet, ut vobis parem gratiam quamcumulatissime referat. Nos autem (ut eo redeat, vnde diuertit, oratio) si Dei templa efficiamur, non erit sane periculum, ne, quod rebus humanis solet accidere, ea temporis conficiat vetustas, ac tandem dilapsa, ac deturbata laceant, vel quocumque casu profligantur: imo vero in omnem aeternitatem permansura esse confidimus. nihil enim, dum acuo sempiterno, Deo bene iuuante, perfruemur, nobis officere, nihil nos vmquam percellere, nihil in nobis quidpiam diminuire poterit, vel immutare. Quae quum ita sint, Auditores, quis non alacri animo elaboreret? quis defatigaretur aedificando? O nos felices, & omni bonorum copia, cumulatatos, si, quid tempus hoc aestiuum, quid nix illa, quid huiusmodi templum nobis innuat, perpetuo cogitauerimus. Quamobrem, quum tam multa in nos Dei beneficia esse vndique collata sentiamus, pareamus tandem, maiore quotidie contentione, diuinis humanisque monitis, quaecumque nobis virtutum adeptionem aperiant, amplectamur. Qui ad praeclara

clara facinora nos imitatione sui erudiunt, aequissimo eos animo confectemur, insistamus vestigijs, ne aberremus. Angelorum chori, qui immortalī Deo semper assistunt, diuinæque voluntati se aggregant, dum ipsi quoque Angelorum officio fungimur, operamque ex animo rebus sacris nauamus, assidue nobis ante oculos obuersentur. Audiamus regium vatem, verbis illis nos cohortantem: *Seruite Domino in timore, & exultate ei cum tremore*. Indagemus honesti rectique semitas: imitemur diuinum illum Samuelem, ab ipsa infantia templo addictum, & consecratum; qui a Deo ad diuina oracula accersitus, quos non suscepit labores? quas molestias recusauit? quod umquam maiorum imperium detrectauit? Diuinum denique praesidium ad haec omnia peragenda imploremus. Nihil erit profecto, cur animorum nostrorum imbecillitatem, aut viriunt tenuitatem pertimescamus. En igitur nobis, Virgo praestantissima, cuius hodie diem festum, atque solennem hilari cactu, arque amplissimorum hominum conspectu agitamus, praesto sis: a tuis beneficijs, quibus a te sumus adhuc ornati, nostra culpa in posterum ne arceamur. Te enim, Virgo, virginem, te matrem, summa demissione suppliciter compellamus vniuersi, Tu illo, nos miseros, in hac rerum caducarum colluione, vario perturbationum aestu agitados, illo, inquam, tuo placidissimo oculorum aspectu digneris. Affulgeat iam nobis sanctissimum, ac nitidissimum lumen: illucescat animorum nostrorum tenebris, o purissima aeterni iustitiae solis Christi Iesu aurora, lux tua, Tu cuncta in nobis prauitatis vitia euellere, funditus erue, radicibus extirpa. Tu denique opitulare, quo humus efficiamur tandem bene subacta, tuaque illa candidissima niue colustrata; ubi demum non vnum tibi tantum, sed innumera prope templa, ad tui cultum ac memoriam, in perpetuum consecrentur. Dixi.

